



序

天壤間孰可壽世惟書可惟書之有德於人者  
可經傳爲大德敦化固與天地同悠久他如醫  
藥地理陽宅等書小德之川流亦流其所敦也  
甯非以世爲壽者而緩急之辨不可離於須臾  
者則陽宅是夫陽宅滙帙束卷亦足汗牛然皆  
各成葫蘆學之者必依樣畫瓢惟玉階愛衆妙  
篇或依門變局或擇君馭相轉禍爲福之妙點

石成金先生之德大矣哉余從遊冀郡栢邑訓  
導鄰初宋夫子時久耳先生芳型旋得識荆已  
酉余館衡邑州同職再魚韓先生家課孫兒者  
六載益得與先生頻交接緣先生與再公先生  
兩契交也愈備識先生之芳型其在天倫者不  
一而足而游藝擅長於陽宅爲特著也且見有  
延請相宅者徵論富貴貧賤有求輒應毫無俗  
念由是德愈廣而求愈多幾欲閉門而不得甚

矣億再公先生長男附學貢生英瞻公與余交  
契時共侍杖履同前席請曰先生陽宅之指南  
數十年來敗者復興貧者忽富功德施人者大  
矣但德及於近地未若施於遐方者廣被於一  
時未若垂於後世者久何如立說著書博施濟  
衆德不更大歟先生謙抑自持堅不允請之者  
三始含首金諾然未敢作等閒觀也先生令嗣  
擎玉公家學淵源奉教有素者於焉先生論定

於前肇公泰閱於後共耗心血歷寒暑者十卷  
帙始成猶欲收藏家箚或繕錄同人無梓行志  
也衡邑韓氏里衛千總職煥如韓先生者先生  
再表兄再公先生從兄也與先生交厚雅愛書  
帙樂成美舉慷慨輸金刊板再公先生醫藥濟  
衆好義樂施者亦竭力玉成同與爲善又同郡  
衡上營村梁珍王公代爲鈔錄付諸棗梨以傳  
大德將見德之及於近方者亦可及於遠方及

於今世者亦可垂於後世此愛衆篇命名之義  
也是知先生之德固壽世無窮而兩韓先生之  
授梓雅誼並王公樂書之清心亦並傳久遠焉  
先生頗重鏤板古道囑序於余因屬夙好誼無  
庸辭惟書所見聞以誌德與書均可壽世云爾

峕

嘉慶五年歲次庚申孟夏梅月新河梁氏里邑  
庠生後學焦蘭芝秀之氏頓首拜題

蘭氏

秀



自敘

余幼讀書家塾。愚笨之質。尚迷途於孔孟之鄉。又向  
暇。勞博乎數學。年十八就讀方氏庄。受業於爲質郭  
夫子。師弟契甚。晨昏功課。口授指畫。頗覺遠勝家塾。  
竊喜學庶有成。詎意半歷年所。忽患採薪。延醫藥治。  
數旬方痊。既痊復作。藥亦無功。先嚴慈以見羸成憂。  
謂讀書命薄。或廢讀歸農。庶可身健。愚遵親命。辭師  
迴轅。事與願左。殊覺歉仄。時思爲讀書事。耗費父母  
許多心血。半途中止。徒嗟親望子職之愧。夜半黎明。



間。滾滾淚枕。計將何以。寸腸迴結。忽念冀西尉遲利。  
有盧先生。習熟陽宅者。向臨舍。示余云。尊宅坤門。遊  
年至東樓。是禍土。公居於斯。病非失養。拆改宜速。勿  
徘徊乎。不經。余以樓室新築。憐於傷財。將信將疑。淡  
然若忘。既因病久。始悔未究其故也。悲夫。適同里李  
廷珍。延盧先生。看瑩域。邀余叨陪。因寃居東樓。染病  
之理。且謂東房。既是禍土。何妻子同室。而我獨病。並  
問何爲遊年。先生卽將遊年歌。信手書來。指余宅式。  
曰。坤門卽用坤天。延絕生禍。五六句。從門順佈八方。

禍到正東故知是禍土。震爲長男。東樓居震地。長男  
不病而誰。若至巽則長婦當災。陽宅諸書載列甚明。  
非虛誑也。余前席驚請曰。陽宅有書乎。先生曰。多甚。  
陽宅要於陰宅。陰宅得吉。死者可以庇生。陽宅犯凶。  
生者可以卽死。一脈無二理。遲速分緩急。公其知之。  
余來朝卽借陽宅書帙觀之。如夢初醒。貼然心服。先  
生旋開書名六種。一必用一十書。一大全。一圖解。一  
要覽。一集成。余赴衡邑。一並購買。晝夜參閱。方存其  
論說不一者。以就正焉。而盧君奄忽物化。鄙何以命。

薄於孔孟者。復福薄於數學也哉。冀坤王村孝廉公  
潛菴司先生者。宿學名儒也。館余岳家。衡尚營村。徃  
謁之。請陽宅之教。先生言。素雖未諳於習。其要不外  
於河圖洛書。先天後天卦爻。洪範九疇。流其源。聊切  
指畫。殊覺豁然。首肯。知大道無乎不該。益恨余之病  
阻於儒也。有允範楊公衡。邑素通陽宅者。訪之。祇言  
用大遊年。從門順佈八方。星宮相生。則吉。相尅則凶。  
宅之東。四西。四各不相犯。拆修。遵憲書時日。法盡乎  
此。進究拆修。改正年煞。月煞。日煞。何以撥避。楊公未

之前聞又雷貫通陰陽宅者。素強。姜村有貴楚李先  
主。謁拜與語。大叩小叩。如鐘鳴相應。雅不以志同道  
合者。賈相見已晚之恨。雖然。先生學陽宅本先天八  
卦。是體主靜。余學陽宅本後天八卦。是用主動。先生  
推後天爲準。非自抑以揚人理。寔然矣。及問書傳真  
假。選擇撥煞。母乃有僞書欺世者乎。先生曰。多甚。唐  
丘延翰得異人傳。元宗禁其書於內府。復招一行禪  
師。僞撰銅函經。以愚百姓。後僖宗改元廣明。避巢變  
出京都。楊益與曾求已竊延翰真書。以還江右。楊益

遜遐方曾求已被李節度尋獲復撰偽書以免禍偽書迭出此其始也宋吳景鸞奏真宗表內言正經已失二百餘年楊傳曾曾傳陳希夷景鸞父克誠親師希夷方得真傳觀此則古仙之傳授淵源有自而諸家之流弊亦已久矣甚矣真偽之不可不辨也欲明神煞真偽非見協紀辨方與選擇集要不可購買二書更沽永寧通書一部相悅以辨昭昭乎理與心洽余聆是說三十年來忝閱考訂所宗惟發明軒轅本旨及陽宅集成圖解大全與本楚邱允臧而來者陽

宅大全論說理道甚微。欽定協紀辨方。與選擇集要。批駁僞煞甚悉。至於陽宅十書推宅體吉凶。與門前樹木池塘道路。頗有可取。若符鎮紛紛。斷不可爲。此所逃。且以福元定東西四宅。以人之生年爲主。不以宅向爲主。若父年東四。子年西四。兄年西四。弟年東四。則父宅子何以居。兄宅弟何以居乎。或用截路分房法。各合生年各立門戶。倘若夫年東四。生人妻年西四。生人不便各立門戶。必不同室居。方可此。又何。以處置。又五鬼穿宮內說。廉貞到本宮。每歲二房榮。

長男權柄事合家富貴亨余思廉占屬火本宮是離  
火見火更助其凶急速拆改猶恐救正不及而反言  
大吉何也陽宅必用變宅圖內於輔弼二星當用而  
不用不當用而用之豈知化宅九層方用右弼安可  
任意而用之且許多鎮禳約與十書同或永寧通書  
以左輔右弼二星俱屬陰木陽宅總論輔弼入乾垣  
項羽獲沛公之父輔弼入艮垣郭氏絕賈相之嗣不  
知輔弼何以並行何以而知其俱屬陰木果爾是與  
貪狼爲三木矣各變宅內余從未見有三木者且動

靜二宅俱用輔弼。是主房兩旁左爲左輔右爲右弼。又必高於主房爲吉。前言凶後言吉。矛盾之甚。余竊疑前後之俱非。陽宅集成專以紫白爲主。不以遊年爲是論說精微。亦甚透亮。能不貼然心服。但與大遊年不合。余學習陽宅。始自大遊年入門。不敢違紫白之說。俟質高明。再指髦迷也。可至於選擇神煞一書。各有一說。惟依本年憲書。年建月建爲主。太歲爲歲煞之君。月統於年。故二十四山無吉凶。聽太歲爲吉凶。有不從太歲起者。皆僞造也。日統於月。六十日亦



無吉凶。聽月令爲吉凶。凡爲月之所合。所生。及與月  
令同旺者。乃真吉日。如旺日。相日月德日之類。是也。  
目之支于爲月之所尅。所衝。及休囚而不當月令者。  
乃真凶日。如破日。正傍四廢。荒蕪之類。是也。有不從  
月令起者。亦僞造也。余觀陽宅大抵以陽宅集成圖  
解大全。與陽宅大全爲宗。擇日以協紀辨方。選擇集  
要爲主。其餘諸書某某。聊佐參閱云爾。詎敢盡信。蓋  
古往今來。戾天及淵。一理而已。合理者從之。悖理者  
違之。合歷者依之。背歷者置之。酌理以協乎。歷斯爲